



Wie der Marchrave die Könige mit ir
rechen in sin hus empfie.

XXVII. Auenture.



n solhen unnozen. soln wir die frowen lan.
hie wart vil michel gahen. ober velt getan.
von Kudgeres frivnden. da man die geste vant.
si wrden wol empfangen. indes marcgraven lant.

Do si der marcgrave. zuo zim chomen sach.
Rudeger der snelle. wie vrolich er sprach.
sit willechomen ir herren. vnt oveh iwer man.
hie indisem lande. wie gern ich ioch gesehn han.

Do danchten im die rechen. mit triwen ane haz.
das er in willechomen wäre. vil wol erzeichter das.
sonder groozter Hagenen. den het er e' bechant.
sam tet er Volkeren. den helt von Burgonden lant.

Do sprach zem marcgraven. Danchwart der degen.
sit ir vns welt bervochen. wer sol vns danne pflegen.
des vnsern ingesinde. von Wormez ober Rin.
do sprach der marcgrave. die angeft solt ir lazen sin.

Es wirdet wol behalden. swaz ir indaz lant.
habt mit ir gefvret. ros silber vnt gewant.
dem schaffe ich solhe hute. das sin wirt niht verlorn.
das ir zeschaden bringe. gegen einem halben sporn.

Spannet of ir knechte. die hotten an das velt.
swaz ir hie verliefet. des wil ich wesen gelt.
vnt ziehet abe die zowme. diu ros diu lazet gan.
das het in wirt deheiner. da vor vil selten getan.

Des freuten sich die geste. do das geschaffen was.
die herren riten dannen. sich leiten indaz gras.
ober al die knechte. si heten gvot gemach.
ich wän in an der verte. nie so sanfte geschach.

Nu was diu marcgravinne. for das tor gegan.
mit ir vil schonen tohter. do sah man bi ir stan.
die minneklichen frowen. vnt manige schone meit.
die trugen vil der bouge. vnt oveh die hertlichen chleit.

Das edele gesteine. verre lohete von in dan.
v; ir vil richen wäte. die warn wol getan.
do chomen och die rechen. vnt erbeizten sa zehant.
hey was man grozer zehete. an den Burgonden vant.

Sehs vnt drizzech meide. vnt ander manic wip.
den was zewnsche schone. vnt minneklich der lip.
die giengen in enegeene. vnt wolden si enpfan.
da wart ein schone grvzen. von den frowen getan.

Div iunge marcgravinne. chofte die kunige dri.
alsam tet ir moter. da stont och Hagen bi.
den bat ir vater choffen. do blicte si in an.
er dohte si so gremlich. das si gerne hete lan.

Doch muste si da leisten. das ir der wirt gebot.
gemisschet wart ir varwe. bleich vnt rot.
si chofte och Danchwarten. dar nach den spileman.
durch siner libes ellen. wart im das grvzen getan.

Div iunge marcgravinne. nam do bi der hant.
Giselhern den rechen. von Burgonden lant.
alsam tet ir mwoter. Gunthern den chonen man.
Gernoten forte Kudeger. mit in minnechlichen dan.

Inder schonen büрге. stont ein witer sal.
ritter vnt frowen. gefazen da zetal.
do hiez man balde schenchen. den gesten goten win.
es endorsten nimmer helede. gehandelt gwellicher sin.

Mit lieben oggenblichen. wart vil gesehn an.
div Kudegeres tochter. div was so wolgetan.
ia trvotef indem hercen. vil manic ritte gnot.
das chunde och si verdienen. si was vil hohe gemvot.

Si gedahten swes si wolden. es enmoht aber niht gesehn.
an mägede vnt ouch an frowen. wart da vil gesehn.
for vnt widere. wande ir saz da gewoc.
der edel videläre. dem wirtu holden willen trooc.

Nach gewonheite. do schieden si sich da.
ritter vnt frowen. die giengen anderswa.
do rihte man die tische. in dem sale wit.
den vil lieben gesten. man diene willekliche sit.

Durch der geste liebe. hinze tische gie.
niwan diu marcgravinne. ir tohter si do lie.
beliben bi den kinden. da si von rehte saz.
daz si ir niht ensahen. die geste muete sere daz.

Do si mit freuden heten. gegezzen umberal.
do wiste man die schonen. wider inden sal.
gämelicher sprüche. der wart da niht verreit.
der reit vil da Volker. ein degen chyen vnt gemeit.

Do sprach offentliche. der tiure spileman.
vil richer marcgrave. got hat an ir getan.
vil genädekliche. daz er ir hat gegeben.
ein wip so rehte schöne. dar zu ein wunnekliches lebn.

Ob ich ein forste wäre. sprach aber der spileman.
vnt solde ich tragen chrone. ze wibe wolde ich han.
die iuern schonen tohter. des wünnet mir der muot.
diu ist minneklich zesehene. dar zu edel vnt got.

Do sprach der marcgrave. wie möhte daz gesin.
daz immer kunic gegerte. der lieben tohter min.
wir sin beide ellende. ich vnt ouch min wip.
vnt haben niht zegebene. was hilfet danne ir schöner lip.

Do sprach der herre Gernot. ir solt die rede lan.
vnt solde ich trotinne. nach mine willen han.
ane goot zewibe. wär ich ir immer vro.
des antworte Hagene. vil harte minneklichen do.

No sol doch her Giselher. min herre nemen wip.
es ist so hoher mage. der maregravinne lip.
daz wir ir dienen gerne. ich vnt ander iwer man.
vnt foldes under chrone. da zen Burgonden gan.

Div rede Rodegeren. von in dohte goot.
vnt och die maregravinne. ia fretez in den moot.
sit trugen an die helde. daz si zewibe nam.
Giselher der edele. wandez in beiden wol gezam.

Swaz sich sol gefogen. wer mac daz vndersten.
man bat die iwncfrowen. hin zehove gen.
do swor man im zegebene. daz winnekliche kint.
och lobt er zenemene. die vil minnekliche sint.

Man beschiet der iwncfrowen. borge vnt lant.
des sichert da mit eiden. des richen chuniges hant.
vnt Gernot der herre. daz werde daz getan.
do sprach der maregrave. sit ich der lande niht enhan.

Sone lat ir niht versmahen. min ellendes solt.
ich gibe zu miner tohter. silber unt golt.
swaz zwei hondert möre. meiste mugen getragen.
div rede muoste den degenen. beidenthalben wol behagen.

Nach gewonheite. man hiez an einen rinch.
sten die minneklichen. manec sneller iwngelich.
ingezweietem mwote. ir ze gegene stont.
si gedahten in ir sinne. so noch die tomben dicke twont.

Do man begunde vragē. die minneklichen meit.
ob si den rechen wolde. ein teil was ez ir leit.
vnt dahte doch zenemene. den wätlichen man.
si schante sich der vrage. so manic maget hat getan.

Ir rvonte ir vater Rodeger. daz si spräche ia.
vnt in vil gerne nāme. vil schiere was do da.
mit sinen wizen handen. der si do vnbeslos.
Gisfelher der iwngē. swie lozzil si des sit genos.

Do sprach der marcgrave. ir edeln kunige rich.
als ir nū wider wendet. daz ist gewonlich.
heim zwo zivren landen. so gib ich ir min kint.
daz ir si mit ir foret. daz gelobten si sint.

Swaz man da schalles horte. den mosen si doch lan.
man hiez die iunefrowen. zir kemenaten gan.
vnt ouch die geste slafen. si erbiten an den tac.
do bereite man die spise. der wirt ir minneklichen pflac.

Do si nū gezen heten. vnt wolden dannen varn.
gein der Hunen landen. daz heiz ich wol bewarn.
sprach der wirt vil edele. ir solt noch hie bestan.
wande ich so lieber geste. selten her gewinnen han.

Des antworte Danchwart. iane mages niht gefin.
wa nāmet ir die spise. daz brot vnt ouch den win.
daz so manigem manne. wāre hie bereit.
do daz der wirt gehorte. ez was im ane mase leit.

Do sprach der marcgrave. dir rede ist ane not.
ze vierzehē nehten. win vnt brot.
gebe ich ir völeklichen. mit den die ir noch hie hat.
ir mozet hie beliben. des ist deheiner slachte rat.

Swie vil si dannen gerten. si wofen da bestan.
vnz an den vierden morgen. do wart och da getan.
von des wirtes milte. daz verre wart geseit.
er gap den finen gesten. beidiu wafen vnt kleit.

Es mohte wern niht langer. si wofen dannen varn.
Kodeger der chunde. vil wenic iht gesparn.
von der finen milte. swes iemen gerte nemen.
daz versagt er niemen. ez wofe in allen gesemen.

Daz edel ingesinde. brahte for daz tor.
gesatelt vil der roffe. do warte och in da vor.
vil der guten rechen. die trugen schilde enhant.
wande si riten wolden. nider inder Hunen lant.

Der wirt do sine gabe. bot vber al.
e' daz die edeln geste. chömen for den sal.
er chonde mittekliche. mit grozen eren lebn.
die sine schonen tohter. die het er Giselher gegeben.

Do gab er Gonthere. dem helde lobelich.
daz wol trvoc mit eren. der edel kunic rich.
swier nie gabe enpfienge. ein waffenlich gewant.
do neich der furste here. des mitlen Kodegers hant.

Do gab er Gernote. ein wafen gvot genvoc.
daz er sit instormen. vil herlichen trovoch.
der gabe im vil wol gonde. des margraven wip.
da von der gute Kodeger. wofe vliessen sit den lip.

Do bot diu margrauinne. Hagen ir gabe alsam.
mit bete minnekliche. sit si der kunic nam.
daz er ane ir stivre. zuo der hochgecit.
varn niene solde. der helt gelobt ez ane strit.

Alles des ich ie gefach. sprach do Hagene.
sone gerte ich niht mere. nu ze habene.
niwan ienes schildes. der dort hanget an der want.
den wolde ich gerne foren. mit mir in der Hünen lant.

Do die marcgravinne. Hagen bete vernam.
ez mante si ir leide. weinen si gesam.
do gedahte si vil tiure. an Unodunges tot.
den het erflagen Witege. des twanc si iamerlichiv not.

Si sprach zu dem degene. den schilt wil ich ir geben.
daz wolde got von himele. daz er noh solde leben.
der in da trug enhende. der lag instorme tot.
den mu; ich immer weinen. des gat mir armen wibe not.

Die edel marcgravinne. von ir sedele gie.
bi dem schilt vezzil. si den schilt gevie.
do brahte si in Hagene. si selbe mit ir hant.
die gabe was mit eren. an den rechen gewant.

Ein holft von liehtem pfelle. ob finer varwe lac.
bezzet schilt deheimen. belohete nie der tac.
von edelm gesteine. swers zehooften hete gegert.
oder in veil hete. er was wol to sint marche wert.

Den schilt hiez do Hagene. von im tragen dan.
do chom sin broder Danchwart. hin ze hove gegan.
dem gap vil richiv chleider. des marcgraven kint.
die er da zen Hünen. trove vil herlichen sint.

Alles daz der gabe. von in da wart genomen.
in ir deheines hende. war ir niht bechomen.
wan durch des wirtes liebe. derz in so schone erbot.
sit wredens im so vint. daz si in muosen slahen tot.

Volker *der vil snelle* mit siner videlen dan.
chom gezogenliche. for Gotelinde stan.
er videlt sveze done. vnt sang ir siniv liet.
da mite nam er vrloupp. do er von Bechelaren sciet.

Ir hiez div maregrauinne. eine lade tragen.
von frivntlicher gabe. mveget ir nv horen sagen.
dar v3 si nam sehs pouge. vnt spiens im an die hant.
die solt ir foren Volker. von mir in der Hunen lant.

Vnt solt durch minen willen. si da zehove tragen.
svenne ir wider wendet. daz man mir myge sagen.
wie ir mir habt gedienet. da zer hochgecit.
des si zem rechen gerte. vil wol gewert er sis sit.

Do sprach der wirt zen gesten. ir solt dest sanfter varn.
ich wil ioch selbe leiten. vnt heizen wol bewarn.
daz man iv vf der strazen. nem deheiniv pfant.
ich sol ioch selbe leiten. in daz Ezelen lant.

Der wirt wart wol bereit. mit fons hundert man.
ze rossen vnt ze chleidern. die fort er mit im dan.
in vrolichem mvote. zu der hochgecit.
der deheiner nimmer mere. chom ze Bechelaren sit.

Mit chosse minneklliche. der wirt do dammen schiet.
Also tet ovch Giselher. als im div liebe riet.
mit vnbeslozen armen. si troten schoniv wip.
daz mvose sit bewainen. vil maniger ioncfrowen lip.

Vil venster wart entslozen. vnt wit vf getan.
der wirt mit sinen mannen. zen rossen wolde gan.
in wän ir hercen sageten. div chresteklichen ser.
daz si der lieben frivnde. dar nach gefahen nimmer mer.

Nach ir lieben friunden. heten genoge leit.
do weinten ane maze. vil frowen vnt manic mrit.
doch riten si mit freuden. nider ober sant.
zetal bi Eonowe. vnz in das Hunische lant.

Do sprach zen Borgonden. der ritter vnverzaget.
Kodeger der edele. ia soln niht sin verdaget.
Ezeln disiu märe. daz wir zen Hunen chomen.
vnt och mine frowen. sine hant so liebes niht vernomen.

Zetal durch Oestiriche. vil manec bote reit.
den luten allenthalben. wart daz wol geseit.
daz die herren chömen. von Wormez ober Rin.
dem Ezeln ingesinde. chunde niht lieber gesin.

Die boten for strichen. mit disen mären.
daz die Kibelunge. zen Hunen wären.
du solt si wol enpfahen. Chriemhilt frowe min.
dir choment nach grozen eren. her die stolzen brooder din.

Do diu kuniginne. vernam diu märe.
ir begunde entwichen. ein teil ir swäre.
von ir vater lande. chom ir vil manic man.
da von der kunic Ezele. vil manigen iamer sit gewan.

Si gedahte tougenliche. noch mohte is werden rat.
der mich an minen freuden. also gepfendet hat.
mag ich daz gefogen. ez sol im leide ergan.
ze dirre hochgeite. des ich vil goten willen han.

Ich solz also schaffen. daz min rache erge.
indirre hochgeite. swiez dar nach geste.
an sinem argen libe. der mir hat benomen.
vil der minen wunne. des sol ich nu zegelte chomen.